

四庫全書

集部

欽定四庫全書

未軒文集卷十

明 黃仲昭 撰

七言詩

丙戌登第有作

雷奮春聲動九區，羣龍變化上雲衢。  
奎躔午夜文星聚，日馭中天瑞彩扶。  
經濟未能攀董策，姓名深愧濫齊竽。  
平生一片丹心在，擬獻君王贊廟謨。

賜宴瓊林和同年韻

錫宴瓊林集縉紳風輕簾幙淨無塵紫笙吹徹鈞天曲  
綠醕分來湛露春烏帽花偏恩渥重錦衣日映寵光新  
小臣未效涓埃報但誦周詩答至仁

釋菜和同年韻

朝罷鳴珂出禁城橋門釋菜列簪纓春回芹藻香風動  
日射宮牆曙色晴萬古人才歸化育兩間倫紀賴昭明  
願將餘澤資王化還冀神功默相成

送劉景輝先生教諭萬安

花飄紅雨點征鞍  
教鐸遙持向萬安  
珠玉一囊吟卷重  
虹蜺萬丈劍光寒  
談經自識膏粱味  
入饌寧嫌苜蓿盤  
桃李滿門培植久  
春風取次進金鑿

贈夏文振

文振父以醫術仕於京因家焉為  
人個儻不羈蓋古豪俠之流也

名駒應可入天閑  
浮世難逢伯樂看  
蛟影橫秋歐冶劍  
虹光貫室葛仙丹  
青尊長向花前醉  
綠綺時將月下彈  
還有夢魂飛朔漠  
長纓千尺繫樓蘭

賦得洪都艤棹送同年張叔亨使東廣

手捧綸音出帝州  
豫章城外整維舟  
文星高映青山郭  
使節光臨綠水洲  
徐孺宅前吟弔古  
滕王閣上醉尋幽  
計程漸近東甌路  
此去分明是畫遊

送侍御揚朝重巡按江西次同年丘安重韻

黎元爭欲覩衣冠  
憲節南行雪尚寒  
折獄常持三尺法  
濟時更有九還丹  
撫摩凋瘵春隨馬  
屏斥奸諛鐵作肝  
後夜望君君不見  
法星一點照雲端

挽蘭谿郭政浩處士夫婦

騎鶴相隨蓬島去茫茫雲海碧連空遺編賸積經年蠹  
清夜誰九舊日熊黃菊東籬悲暮雨青蘋南澗怨春風  
百年世事渾成夢贏得穹碑夕照中

送楊礪珍還閩

王事匆匆到日邊相逢一笑酒尊前歸心又遶閩山月  
去路還尋潞水船千里霜蹄寧久蹶九霄風翮定高鶩  
為君豫掃詞垣榻折桂重來話昔年

送太學生周環依親還吉水得金字

尚書文襄公之孫也

十年芹泮擁青襟  
壁水新沾雨露深  
明月暫同官舍酒  
白雲又動故園心  
帆開潞渚潮平岸  
路入廬山花滿林  
天上還期繩祖武  
勛名奕葉重南金

送太學生宋漑依親還吉水得黃字

同年爾章之從弟也

萬里觀光謁聖皇  
寧親又喜得還鄉  
都門落日開帆影  
玉署東風散鴈行  
淮浦雪消春漲綠  
吳山雨過晚橫蒼  
青雲還勵平生志  
來歲庭槐花又黃

送同年李廷章侍其尊府亞卿先生致政歸安成

得還字

廷章時為庶吉士

懇上封章動聖顏  
許隨鶴髮到鄉關  
花邊獻壽流霞煖  
膝下承歡舞袖斑  
橋梓榮沾新雨露  
衣冠光映舊溪山  
五雲深處羣僊候  
好逐春風鴈北還

送翟知縣瑄之任開化得秋字

同年廷光之兄也

曾將三策獻宸旒  
今拜郎官寵命優  
鳧鳥雙飛辭北闕  
奎星一點照南州  
暫從叢棘棲丹鳳  
終向康莊騁紫騮



後夜相思天萬里共看明月一輪秋

送月潭上人歸東巖

談經曾借白雲扉京國重逢是舊知  
衣鉢新承天上命煙霞又動夢中思  
龍降滄海浮杯處虎伏空林振錫時  
此日故山應有北庭松朝偃向南枝

送同年俞舜卿任南京刑科給事中

曉辭龍袞向南畿帶得天恩入瑣闈  
戀闕應勞清夢到匡時莫遣諫書稀  
雲邊山色青迎騎雨後花香煖撲衣

便道懸知歸故里松楸桑梓盡光輝

挽鈞州學正林菊庵先生

昨夜清霜悴玉芝士林空仰舊容儀一襟秋月持衡處  
滿座春風振鐸時白首功名歸蝶夢青霄事業付麟兒  
玉堂大院題銘在千古人看有道碑

挽袁母張氏

同年章元益索

一赴瑤池金母宴海天歸路杳無期菱花塵掩青鸞老  
慈竹霜寒彩鳳悲春色自回芳澗藻月華空照錦機絲

生平懿行知何在盡付空山太史碑

春風歸省送同年劉述憲

尚書廣衡之子也

曲江花發春融融看花踏遍香塵紅九重有詔賜歸省  
紫駟玉勒搖東風堂上萱花榮晚節獻壽瑤觴春酒冽  
相期早向五雲中重紹尚書舊勲烈

送柳聰千戶襲職還瞿塘

青春風采照秋旻匹馬都門問去津一劍傳家勲業舊  
九天拜命寵恩新身隨白鴈過南楚夢逐紅雲捧北辰

蜀檄近來聞有警揮戈早為掃煙塵

謁文丞相祠

故宮芳草泣銅人滄海樓船是紫宸  
赤手欲擎西陸日丹心誓掃北來塵  
山河萬里歸元主廟宇千年祀宋臣  
翹首燕山知幾仞至今高節共嶙峋

送撫寧侯朱永北征

將軍拜命向邊城坐鎮天山翼太平  
風起柳營朝草檄月明玉帳夜談兵  
貔貅宣力皇威振烽燧銷光塞漠清

勲業行看光汗簡肯教衛霍獨馳名

遣懷四首

赤手當時欲捕龍十年回首轉成空  
學求匡世偏招侮詩未驚人已覺窮  
多病伶俜憐汲黯一官落魄笑揚雄  
襟期欲話無人共坐對清尊月正中

誰點霜華入鬢斑雨聲連夜苦潺潺  
逢迎無術貧誰咎婚嫁催人老未閒  
仗節伏波遭死謗知幾疏傳却生還  
聖恩倘賜餘生骨便買丘園入亂山

蝸角蠅頭夢已休紅塵奔走更何求  
經綸有志俱成幻造化無情苦見讎  
泉石不妨為老計乾坤何處是生謀  
此身却悔從前誤輕擲漁竿事遠遊

窮達看來是偶逢蒼天影響竟夢夢  
老親菽水貧能樂浮世風波夢亦慵  
白骨終須隨劫化黃金何用覓侯封  
試看舊日豪華地斷礎荒煙積翠重

送林尚和還莆二首

侍御貴實從姪也後一首代作

遙隨大阮來京邸家學淵源細討論  
逝水東流驚歲月

白雲南望憶椿萱  
關河明日成千里  
風雨何時共一尊  
相約曲江春到後  
杏花深處候來轅

客窓燈火久談經  
幾度堦前見落萸  
夢裏老親雙鬢白  
望中故國亂山青  
一尊菊醕芙蓉岸  
數幅蒲帆杜若汀  
大阮青霄應惜別  
龍門竚待駕風霆

代馬世用侍御送太學生葉蕃依親歸泉州

其父嘗被

冤抑蕃為懇於官  
得理故末句及之

客邊每共嘆飄蓬  
鵬路憐君尚未通  
萬里故山今日去

一尊芳醕幾時同尋幽北固過梁寺弔古西湖謁宋宮  
歸報巖翁應慰喜日光已照覆盆中

謫官之湘潭夜泊蕭家林和莊孔暘韻

鴉背殘陽度遠洲荒村籬落暮煙稠浮生飄泊多行路  
此地經過幾繫舟戀闕心隨雲北去思親夢逐水東流  
臨風却羨沙頭鷺欲結新盟謝遠遊

題山水小景

水亭六月冷如秋捲幔看山百不憂借問來舟何處客



江湖風浪幾時休

題太華冬官雙喜圖

和同年羅應魁韻

仙郎遊宦歲華深  
清節應無愧古今  
雙鵲也知消息好  
高堂日日報佳音

題四禽圖為徐若川秋官賦

海棠鸚鵡

等閑學得語分明  
紫禁春風試一鳴  
自是鷹鷂容不  
得海棠深處暫停聲

萱花小鳥

幽鳥飛來錦翼齊  
忘憂花底任依棲  
雕籠鸚鵡應相妬  
莫向上林高處啼

枯荷鵲鷓

秋水殘荷占一枝  
飛鳴應似急難時  
紫荊花樹凋零久  
吟倚東風有所思

敗葦鷓鷃

天上紀星曾取象  
詩中托興久知名  
鷓鷃雖大那能似

空自騫騰上太清

送辦事官吳藻省親歸莆

友人從茂之弟也

書劔三年客帝畿承恩今喜謁庭闈不須重製斑斕服  
自有新裁錦繡衣一棹纔乘潮水去寸心已逐海雲飛  
難兄林下幽棲穩應笑紅塵客未歸

題宋宗室郊勤孝王墓樟樹圖二首

樹在浙之平陽宋時所植

也其裔孫太學生永輝索

胡塵一夜滿乾坤十六陵中草色繁舊物又隨時運去

何如茲樹至今存

何如茲樹至今存  
厚地深蟠百尺根  
奕葉孫枝沾雨露  
清陰千載庇丘原

送顧安道御史僉憲河南

新鴈催寒柳葉稀  
使君匹馬出南畿  
已遷臬府新官秩  
仍着烏臺舊繡衣  
崖谷有天回淑氣  
豺狼無地避霜威  
法星暫照中州去  
終化台星入紫薇

秋日寫懷

卷十  
一官南北總窮途，浮世逢人笑腐儒。  
囊裏無錢還藥債，門前有客索詩逋。  
滿天風露鳴蟬亂，萬里煙雲旅鴈孤。  
一片歸心留不住，非因故國有尊鱸。

賀太常少卿夏公陞大理卿代孫寺丞賦

夏公先由大理

少卿改太常

久向雲霄仰盛名，同官今喜挹餘馨。  
伯夷暫典虞廷禮，定國還詳漢室刑。  
門絕苞苴春草綠，獄求欽恤夜燈青。  
似聞太史占玄象，執法星高燭紫冥。

題穀城春色圖為徐若川秋官賦

莆俗相傳古有識云城山青黃

石出公卿若川黃石人也故未句用其意

穀城風景浩無涯  
春入林巒景更嘉  
萬頃松陰晴滴翠  
半巖花氣煖蒸霞  
降神長見鍾人傑  
興雨時能潤物華  
早晚公卿佳應協  
鳳銜丹詔到君家

題四景山水為林君叔孟賦

門掩青山盡日閒  
紛紛朝市懶相干  
交遊滿眼知音少  
笑拂瑤琴獨自彈

水邊亭榭絕炎燄坐對遺經日易消載酒有人來問字  
隔溪撐過木蘭橈

秋入林垆晚覺涼閒尋詩景步斜陽笑渠羸馬風塵客  
底事匆匆有許忙

滕六飛花散九垓乾坤萬象變瓊瑰詩翁胸次春無限  
溪上衝寒曉訪梅

雪夜歸舟和周次玉太守韻

晚風吹雪滿江流酒盡賓筵便解舟歸去養成文五彩

他年天上贊皇猷

江上梅花開已齊  
蟾光雪色望還迷  
歸心擬獻庭闈壽  
不是風流憶剡溪

題鄉先生卓季新龍山別業卷

龍山在  
惠安縣

龍山風景足徜徉  
况是林巒接故鄉  
萬頃松雲當戶暝  
一天花雨入簾香  
荷鋤煙隴春陽動  
散帙晴窓月色涼  
浮世氛埃飛不到  
分明一段輞川莊

挽韶州貳守方源學先生

行人柳東先生之弟也



淵源家學紹難兄  
壁水翱翔羨老成  
共說王祥能佐郡  
還誇疏受早辭榮  
龍蛇倏爾驚新夢  
松菊翛然負舊盟  
贏得五花鸞誥在  
龍光千古賁丘瑩

丘山風木為林崇起賦

一雙白壁闕佳城  
春雨秋霜歲屢更  
泉壤無由醒蝶夢  
松楸不斷起風聲  
感時空洒皋魚淚  
終古難酬季路情  
我亦與君同此恨  
臨圖悲愴欲無生

題周廣德翠渠亭次周鶴洲韻

翠渠遶舍淨無埃  
渠上孤亭傍竹開  
數載各因微祿去  
今朝同載小舟來  
閑聽啼鳥裁詩句  
笑對青山酌酒杯  
情景留人歸未得  
隔林已見晚鴉回

題周鶴洲延綠亭次吳修撰韻

無事頻將兔穎拈  
批風抹月坐虛簷  
春回蘭蕙香浮几  
雨過庭除翠入簾  
門外渟涵諸水匯  
天南依約數峰尖  
箇中何物尤清絕  
滿架琴書一鶴兼

挽三山林質齋處士

進士玘之父也

金匱要略卷之五  
卷下  
隱君僊去已多時月旦高名尚在茲負土不辭營宅兆  
買田多為恤孤嫠芝蘭鍾秀香風藹棗萼連枝春日遲  
我亦高山興仰止楚招歌罷不勝思

和答余以貞僉憲見寄韻言懷二首

迂踈已分老閩垓松菊當年手自培却笑浮雲無住著  
誤含雨意出山來

誤含雨意出山來枯槁難將一滴培便欲陳情乞骸骨  
荷鋤歸理舊田垓

送丘安重侍御之京次周時可僉憲韻

時予寓延平

鴈聲催老劔潭秋  
客裏那堪送客愁  
人海憑君標砥柱  
狂瀾盡使向東流

遊武夷九曲借用文公先生韻賦棹歌十首

我來九曲訪僊靈  
積雨初收天氣清  
舊日虹橋無覓處  
依然山色與溪聲

一曲呼來隔岸舡  
棹歌齊唱過前川  
山靈似識遊人意  
斂盡峰巒遠近煙

二曲溪頭聳碧峰分明玉女鏡中容到來已訝非人境  
峰外竒峰更幾重

三曲丁寧緩刺船茲遊預擬幾經年壑舟不必窮真  
巖上煙雲自足憐

四曲迴看天際巖巖頭空翠落穆篔簹中何物尤清絕  
雲影天光共一潭

五曲峰巒轉覺深千年精舍在雲林古今遊客知多少  
誰識先生一片心

六曲幽林擁碧灣，擬分隙地闢柴關。  
細窮往哲傳心要，谿月巖雲相伴閑。

七曲停橈亂石灘，層崖疊巘恣吟看。  
更憐雲際千尋瀑，爽氣逼人毛骨寒。

八曲悠然眼界開，谿山如此可能迴。  
茲行須盡平生興，未卜何時得再來。

九曲桑麻翠渺然，數家雞犬隔晴川。  
竒蹤到此都看盡，還比人間別一天。

同昭武劉太守仁甫遊西庵二首

刺史觀風出郡南，偶陪轡蓋到西庵。  
四山迴合攢幽樹，一徑縈紆入碧嵐。  
移坐竹陰耽野趣，論心杯酒絕浮談。  
誅茅便欲林間臥，未報君恩尚未堪。

看山遊遍郡城南，清絕都應讓此庵。  
流水到門澄碧沼，亂松遶屋擁晴嵐。  
浮生無奈多紛擾，偶暇何妨一笑談。  
此景此人能幾遇，夕陽歸路思難堪。

同昭武劉太守王貳守萬通守遊西峰寺三首

青山一脉似遊龍，山勢將窮秀氣鍾。  
梵宇深藏幽樹裏，行人指點是西峰。

林外應疑無路入，道傍惟見有僧迎。  
行行漸覺招提近，隔崦時聞吠犬聲。

停驂相與坐論文，人得浮生暫息紛。  
怪底襟懷清似許，僧房面面對松雲。

用同年林一中韻哭陳弘載僉憲二首

宦轍南都偶共馳，相逢一笑即相知。  
才高擬報君心眷



數盡難逢國手醫朋舊一觴歸櫬遠妻孥千里旅魂悲  
懷君何處腸堪斷月落空梁夢覺時

按節遙衝瘴雨寒西風聞訃淚交潛憶君九曲分歧去  
問我三山歲月還栢府此時經舊宅泉臺無路覓清顏  
全歸俯仰應無愧百歲誰能脫此關

送仙遊陳司訓考滿歸潮州省親

十年芹泮育英才夜夜庭闈有夢回喜趁瓜期過梓里  
欲從華旦獻霞杯趨朝重捧毛生檄訪古閑登郭隗臺

舊日諸生猶仰斗佳音好寄便鴻來

梨關入浙江界感懷

朔風孤騎別莆陽還說閩山總故鄉今日忽驚風土異  
閩山又隔暮雲黃

挽夏孺人用劉欽謨大叅韻

浦城貳令夏寅之母也姑蘇人

斧封春雨長苔痕孝子臨風欲斷魂衣線百年長感恨  
旨甘三釜未酬恩霜凝堂北宜男老雲鎖天南婺女昏  
愁絕壺儀招不返東蜀還擬奠清尊

題畫竹三首為同年鮑栗之賦

蒼苔迸破籜猶含太守清貧亦不饑  
剪伐不加生意足  
凌霄高節碧毳毳

飽沫東君雨露私森森勁節與雲齊  
春風養就林間實  
留待丹山彩鳳棲

憶昔鑿坡寓直時琅玕節下遍題詩  
十年湖海仙凡隔  
今日披圖有所思

送陳廷章經歷之任松江

除章朝捧出楓宸新拜吳淞入幕賓千里侯邦歸贊畫  
一時民瘼要咨詢地偏白日逢迎少事簡青山覽眺頻  
莫嘆才華君獨屈鵬程九萬是通津

挽楊太安人

早共夫君挽鹿車韶儀淑德世誰逾子承慈訓登朝著  
孫服遺休剖郡符八袞遐齡今古少五花封誥寵恩殊  
登堂我憶曾瞻拜丘隴何當奠束芻

壽弋陽黃憲使七十

仙遊知縣  
璪之父也

青春飛步上蓬萊，看破浮榮便乞骸。  
十載乘驄豺虎肅，兩藩執法士民懷。  
童顏鶴髮稀年屆，綠酒黃花晚興佳。  
况有仙郎能繼美，錦衣獻壽舞庭階。

謝病得請口號四首

病懷偏戀故山薇，乞得閑身別袞衣。  
汨黜十年長在告，陶潛今日始真歸。  
還山謾說餘生樂，報國終悲始願違。  
匹馬金臺回首寸，心還傍五雲飛。

歸路新秋暑漸微，到家正及菊花時。  
沉冥豈是甘沮溺。

經濟元須讓稷夔書卷畫長聊足遣山田歲熟可無饑  
高車駟馬從知好只恐風塵湮素絲

十五年間列從臣在公僅閱四迴春廟堂不乏經綸手  
天地堪容樗散人富貴百年聊染指田園數畝足安身  
逢人若問餘生計秋水蘆花一釣綸

羈馬終非性所禁暫來旋復憶山林衙門已分棲身穩  
生計何須著意深健翮冲霄元有路閑雲出岫自無心  
親朋共說如疏傅只是行囊乏賜金

卷十  
挽三山陳叔熙先生

青年挾策覲重瞳一命榮沾教泮宮寧海已看端士習  
定安還喜變夷風清朝共擬升揚震絳帳俄驚失馬融  
紀行有銘垂不朽知君瞑目九泉中

大田驛和任提學見竹偶成二絕

驛亭孤寓無人識賴有此君相對清明日俗塵仍滾滾  
乾坤雙眼為誰明

托根亦在塵寰裏獨得乾坤一味清朝暮相看心似洗

林梢况有月華明

和韻題周憲副墨菊二首

秋滿乾坤菊有花  
簞簞經雨玉無瑕  
蒼然太古雲根石  
飽閱風霜共一家

老圃秋風見此花  
玉人相對總無瑕  
落英聞說堪延壽  
好散蒼生百萬家

題扇面伯牙鼓琴圖為同年談時英賦

山水遺音識者稀  
浮生幸有故人知  
明朝又向江頭別



安得黃金鑄子期

桂花仙子

蟾窟當年花發時  
天香深處識仙姿  
塵凡一隔經三紀  
萬里紅雲繫夢思

凌波仙子

拍天秋水浩無涯  
塵襪凌波任遡洄  
安得微軀輕似許  
同過弱水看蓬萊

題義之觀鵝圖

紛紛世事不堪論  
典午乾坤勢已分  
書罷黃庭無箇事  
閑開池館看鴉羣

六月十六日曉起作

是月十九日立秋

浮生無計挽流光  
歲月催人似箭忙  
屈指又驚秋欲到  
曉來微雨試新涼

承太守王先生見示和林憲使守歲詩次韻

六年守歲宦途遙  
何幸鄉園度此宵  
老至生涯惟藥裹  
春來心事付詩瓢  
癡鳩自詫今巢穩  
驄馬空勞曩日驕

鳳歷明朝入新歲還從野老祝軒堯

次韻王太守感春詩

舉世逢春不解悲春風應合笑人癡賞春只說春光好  
白髮侵頭却未知

又用前韻

人喜春回我獨悲化工雖巧亦還癡陽光遍及閑花草  
空谷幽蘭想未知

送方壽卿秋官之京二首走筆和林見素韻

五色祥雲北望賒君思未報便辭家縉紳擬聽鳴陽鳳  
歲月須驚赴壑蛇離思悠揚縈弱柳詩懷浩蕩逐飛花  
酒闌催上驂騑去回首鄉關隔暮霞

河橋握手若為情矧聽陽關醉後聲冰玉祇應堅晚節  
鼎彛終見勒明廷餘生笑我頭空白浮世何人眼更青  
後夜思君天萬里只憑清夢覩儀刑

和答鄭司訓賞蓮詩并訂重遊之約

萍蹤十載寄江湖空涉風濤負壯圖此日紅蓮欣共賞

昔年白壁悔重酤功名隨分心常泰  
勢焰薰天骨亦枯  
還約中秋同玩月九龍山下候車徒

壽林通府景源七十次林見素韻

伉儷稀年錫自天仙經何用更鈎玄  
堦前菊映斑爛服  
堂上歌喧錦綉筵老得身閑增矍鑠  
貌因德邵覺清妍  
從今壽考誰堪並萬仞南山倚翠煙

己未九日烏山登高次劉靜常鄭藏菴東菴韻

白露凝霜催短景黃花泛酒續良遊  
山橫翠黛雲開處

鴈帶斜陽天盡頭百歲功名成畫餅幾人姓字覆金甌

題糕且盡生前樂灑淚何勞身後憂

次靜  
常韻

誰能變理順陰陽偶為登高一感傷多稼盈疇憐就稿  
三農終歲嘆徒忙且呼綠醕互酬酢聊挽春和歸肺腸

老得茲遊良亦幸浮生豐約底須量

次東  
卷韻

浮雲漠漠擁遙岑不解為霖空自陰人事忽看今日改  
菊花還作去年簪廟堂誰是憂民者畎畝空懷愛國心

萬斛閑愁何處遣盈尊春酒不辭斟

次藏  
卷韻

壽姚松雲翁七十二首次林見素韻

陽月如春晝不寒  
稀年壽酒足為歡  
蟠桃一實三千歲  
青鳥傳音約再看

晴曦光映舞衣斑  
滿面和風動笑顏  
俯仰乾坤還自幸  
百年青眼有南山

送妻弟羅元吉之任汝州司訓次林大司成韻

一鐸新持教汝州  
西風話別岳溪頭  
驪駒迭奏催行酒  
霜柳難將綰去舟  
飛夢不離閩嶺月  
作人有待却林秋

清時莫嘆長才屈，大手還修五鳳樓。

鄭藏庵詣下皋訪予，不過以詩見貽。次韻答之。

聞君過訪石田隈，自笑塵緣撥未開。  
春甕無由釀酒候，奚囊又喜送詩來。  
待看一雨通溪舫，還約重遊掃逕苔。  
地僻衡門長寂寞，可堪嘉客又空回。

挽林文恢教授

蔗境優游味正濃，黃梁一夢蕙帷空。  
菊松三逕悲元亮，桃李諸生哭馬融。  
高塚麒麟秋草裏，穹碑鼯鼠夕陽中。



賢郎無限思親淚  
洒向西風恨不窮

次張坦齋作廣化山水圖

誰寫雲山著此僧  
王維去後讓君能  
松庭鳥下聞齋磬  
蘿迳煙消見佛燈  
春雨小溪流瀲灩  
夕陽孤塔影稜稜  
看圖便欲離塵俗  
共結茅庵紫翠層

丙辰九月廿四日致政歸寓蒜嶺驛次韻二律

宦海何勞嘆望洋  
東籬猶有菊花黃  
惟應鳥倦投林下  
遑恤牛傷喘道傍  
蕉鹿紛紜憐世路  
尊鱸肥美正秋霜

濟川舟楫今無數誰問天涯野水航

食祿無才翼聖朝掛冠奚敢謂賢勞淵明只合歸三徑  
貢禹應宜上九霄滿地黃雲秋稻熟連天碧海瘴煙消  
塵蹤自笑詩懷減忽見鄉山又覺豪

和陳吉甫韻二首

似與東君有夙期陽回便覺藹晴熙幽情徑路無媒處  
詩思池塘入夢時極浦含煙縈別恨小窓交翠愜吾私  
宦途未了紅塵債醉藉芳茵知是誰

右春  
草

積雨平湖水接空混茫不復辨西東長橋柳色澄深翠  
斷岸桃花映淺紅人喜蘭亭流玉笋我懷沂水浴清風  
幾回江上看湍急直欲窮源路未通

右卷水

過汾水關和高都憲韻

不待尋看地誌文此關形勢昔曾聞天教閩楚從茲限  
水向東西特地分商旅夜酣山店月旌旗暮捲戍樓雲  
時平四海無烽警守險何須萬竈軍

宿車盤驛和陳文耀方伯韻

行盡閩山幾日程  
馬頭人見楚山迎  
君恩未效涓埃報  
垂老茲行敢為名

只說閩山是故山  
今朝倏已出閩關  
古今經濟誰無憾  
畢竟還須早丐閑

題常思嶺蘭若二首

前首和胡憲副韻  
後首和沈大叅韻

天風吹我上招提  
回首羣峰勢盡低  
過客登樓因覽勝  
老僧泚筆請留題  
春雲閣雨過青嶂  
行潦流花入小溪  
自笑迂疎成底事  
亦驅羸馬走東西

蓬萊何處覓仙家  
小剝閑吟興亦賒  
門外有山都是竹  
庭前無地不栽花  
半生牢落多行路  
幾度經過此啜茶  
日暮又投山驛去  
回看樓閣倚雲斜

三山林教諭先生挽詩

先生三子曰清源曰泮  
曰洛淵俱登進士第

蚤際風雲登月窟  
旋承雨露下天除  
棘闈多士推衡鑑  
芹泮諸生仰範模  
浮世功名歸一夢  
朝陽文彩見三雛  
褒封況有雙鸞誥  
萬丈龍光照故墟

感事偶書

壯心一片今猶昔浮世多岐自町畦  
巷伯謾勞傷貝錦伏波誰與辨文犀  
從來山水知音少何怪雌雄過眼迷  
賴有婣娟天際月夜深還照小窓西

挽郭州判

佐縣才華衆所欽重看佐郡慰民心  
一時品藻歸清譽幾樹甘棠藹綠陰  
枳棘忽驚丹鳳老松楸長鎖白雲深  
宦途喜有承家子奕奕聲光動士林

送道錄司玄義堵崇德還京

代賦

帝遣仙郎下玉墀  
函香遠祀二真祠  
江山勝處時停騎  
星斗光中夜祝釐  
王事有期秋復暮  
歸舟難綰柳空垂  
霜臺自笑貧如洗  
握手臨岐只贈詩

壽進士吳浚母八十

浚浙人奉使入閩便道還家遇壽旦臘月廿四日也

八袞慈親初度晨  
皇華桂子正歸程  
分將天祿供珍膳  
摘取梅花薦壽觥  
錦服暫為萊服舞  
使星高傍婺星明  
蒼天福善應無極  
鸞誥還看荷寵榮

和韻題露竹并菊

湘君夜降騎青鸞金鈿落地光團團化作翠筠與黃菊  
空山共傲風露寒

和韻題雨竹并菊

雨過琅玕濕未乾霜餘黃菊尚堪餐他年何處偏思爾  
紫陌雜聲旅夢殘

壽仙遊彭大尹母孺人八十

花縣仙郎獻績歸故園因得壽慈闈蟠桃花並宜男發  
南極星連婺女輝蘭玉一庭春不老星霜八袞世尤稀



更裁文錦三千丈歲歲高堂換舞衣

題孟浩然尋梅圖二首次同年三山王廷用韻

瑤琴世路少知音賴有梅花獨可尋折取一枝良不俗

小齋亦足伴清吟

盛唐風雅見遺音千古斯人何處尋幸有良工寫真意

蹇驢猶似對花吟

題三山施克端江湖覽勝卷次張坦齋韻

乾坤我欲遍經過世事參商奈老何夢遶洞庭秋水濶

心馳禹穴暮雲多  
晉陽謾想唐堯跡  
蜀道空傳李白歌  
訪古知君多歷覽  
遺風還似昔年麼

經常思嶺蘭若和沈大叅韻二首

白雲閑伴山僧住  
閱盡浮生客行路  
老龍行雨澤人間  
雲自無心不飛去

素心長與碧山期  
垂老無緣慰所思  
安得禪房分半榻  
塵纓濯向竹間池

題林氏婿宜榮翠庭卷和楊大叅韻二首

佳趣盈庭浩莫禁春風積翠淺還深  
理從素籥機中悟詩向池塘夢裏尋  
日煖濃香薰壽酒雨餘生意契吾心  
老子粗識濂溪意劇論時容杖屨臨

寸心役物苦難禁揭扁藏修托意深  
天地化工隨處見鳶魚理趣箇中尋  
須酬韋相傳經志莫負侯翁擇壻心  
萬里應從跬步始青編珍重日窺臨

題亡友王世魁所藏墨菊

昔年曾憶此逢君花滿東籬載酒頻  
今日重來花似舊

悽涼不見種花人

經俞潭宿香田莊懷一鶴公子次鄭東園二絕

宦轍驅馳東復西  
青山舊路十年迷  
斜陽艤棹澄潭上

擬共林間一鶴栖

擬共林間一鶴栖  
鶴飛雲路望中迷  
相思吟倚闌干立  
月上松梢影漸西

題九仙觀梅崖

老梅竒崛石峻嶒  
千古風霜共結盟  
世態炎涼少知己

不妨尊酒伴雙清

挽恭愍鍾先生

先生諱同江西人為御史懷愍太子卒上疏請立憲宗皇帝為儲宮

景皇帝怒下錦衣獄死英宗皇帝復辟贈大理寺丞成化末賜謚恭愍

青年射策上金鑿牙服榮聯玉笋班抗疏從教龍準怒  
捐生欲奪鳳雛還心同仁傑艱虞際節與周昌伯仲間  
此日賢郎登禁從蒼天報應未應慳

謁餘干東山書院

東山趙先生與文公友善文公嘗留此數日註離騷經

山連縣市寂無譁先哲遺蹤更可嘉鳥外風帆來客舫

雲邊煙樹見人家  
聖經渾灑從來正  
俗學紛紜却自邪  
安得紫陽長不死  
揮毫重為黜浮華

壬子二月半由金谿往安仁道中作

半月雨聲應暫息  
一年春色已平分  
煖回花塢蒸紅霧  
晴入林巒漲綠雲  
報國丹心空耿耿  
欺人白髮故紛紛  
暫因行路心無事  
明日安仁又校文

壬子春感懷

到官兩度閱年華  
無補明時祇自嗟  
士習未全趨正學

詞章猶覺尚浮誇作興深負人期望寢食難忘帝寵嘉  
春雨連旬農事動夢魂無夜不還家

過匡廬山陰雨諸峰不得見用張太史韻二絕

我來欲覽匡廬勝烟雨冥濛在翼時事到眼前猶不遜  
前途得失底須知

五老諸峰鎖翠煙瀑聲依約聽潺湲竒觀又負平生望  
欲訴山靈孰為傳

予到官甫二閱歲頗覺老態日增因賦二絕

鏡裏韶華嘆易徂  
眇昏雙眼白頭顱  
寫真欲寄兒孫看  
只恐驚疑不是吾

憶別鄉園歲兩徂  
當年玄髮尚盈顱  
故人久別重相見  
盡說今吾非故吾

瑞州分司次壁間諸公留題韻二首

星輶又是瑞陽城  
終歲奔馳笑此生  
山崦孤村藏竹暝  
野塘流水入田平  
桑榆曉日千門影  
絃誦春風幾處聲  
俯仰乾坤驚白髮  
百年心事竟何成



歷遍西江列郡城口宣天語示諸生詞章直欲回純雅  
學術深期輔治平富貴片時真是夢聖賢千古尚垂聲  
斯文揣分非模範大器還應自鑄成

自龍南往安遠道中作

閩廣封疆此接連地偏別是一風烟路迴忽俯千尋澗  
嶺峻應疑尺五天亘野頑雲垂幕暝撲衣飛霰跳珠圓  
斯文倘可裨分寸行役驅馳敢自憐

自信豐往龍南過竹高嶺作

嶺上有二小石峰如  
兜鍪狀土人名之曰

鐵盔峰有一大石峰上有文如鐵甲狀土人名之曰鐵甲峰謂龍南人多為寇皆本於此

登登已度幾嶙嶒鳥道縈回尚未平憲節雙穿青霽去  
輶車多傍白雲行山如盔甲偶然事民習干戈遂得名  
司牧倘能興道化貪泉寧浼隱之清

自瑞金往石城過魏公嶂作

嶙嶒高竦切雲霞倦客經行思轉賒深徑黃茅數十里  
荒村綠樹兩三家羊腸詰屈循崖轉馬足凌兢怯石斜  
世路險巖寧獨此市朝平坦更堪嗟

贛州南安兩郡觀風感懷

贛江橫浦歷星槎兩郡提封數萬家  
守令幾人崇道化士民比屋事豪華  
勞未息吟無緒心事多違鬢有華  
莫道故園先業薄鋤荒猶足種桑麻

袁州道中二首

行邊文牘暫停披閑閱民風一賦詩  
白石煉灰培穉穉青山鋤雨種蹲鴟  
烟村桑柘通幽徑野店杉篁護短籬  
聞說昌黎遺愛在千年尸祝有巖祠

望中煙樹是宜陽  
撫景塵勞覺暫忘  
遠郭諸山圓筍列  
倚天羣岫翠屏張  
頗聞儒術慚郟魯  
却喜民風似魏唐  
太守詞林舊文雅  
行看絃誦藹宮牆

謁南安道源堂

二程子從濂溪先生講學於茲  
宋理宗賜名自書其扁

乾坤有此三夫子  
邂逅于茲豈偶然  
數卷圖書探道妙  
一襟風月悟心傳  
斯文統緒承先聖  
理窟淵源啓後賢  
我欲摠衣挹溫厲  
德容無計起重泉

自石城往寧都道中作

窮冬風露曉淒其倦客何時息馬蹄山合忽疑前路斷  
峯高翻覺宿雲低丹楓翠竹攢幽澗綠蔓黃茅没古蹊  
謾說閩疆近相接故園千里望中迷

謁南安道源堂再用前韻

聖學湮沉世幾遷先生推闡復昭然義前至理探無極  
軻後斯文賴有傳星聚奎躔開道化天將文教付名賢  
千年隆緒思重續掘井何人已及泉

南安訪同年張東海祠和同年張泰侍御韻

南安大守知多少誰復如君有此祠施設總根經史學  
死生均繫吏民思平生不負王曾志終古難磨叔子碑  
遺像儼然猶不死何須更賦擬招詩

次陸憲長元日即時口和四首

詩以冰行押韻  
遵洪武正韻也

雨聲除夕響泠泠元日乾坤一色冰欲起堯夫詢世事  
北方風氣果南行

春回已是過旬日一雨翻成萬樹冰何日乾坤放春色  
傍花隨柳一閑行

金步曰月全言  
卷十  
殘冬兩度冰凝水今日三陽水又冰聞說蒼生多凍餒  
不知陽氣幾時行

易戒履霜防漸長于今三度見堅冰腐儒無識空憂嘆  
自有伊周贊五行

題同寅洪憲副文壇風月卷次韻

紅燭清尊豈偶逢十年同聽禁垣鐘豪談發處風生席  
白戰酣時月映松應務羨君才獨裕濟時愧我術偏庸  
人生適意應為福底用凌烟閣上封

右次李  
若虛韻

旂常未論百年功且樂清尊一夕同  
大嚼霜螯羹薦蟹  
熟燔珍掌饌分態似聞大史占玄象  
曾說文星燭紫宮  
却笑世途多得失伊誰勦破楚人弓

右次馮  
佩之韻

高揭吟壇數仞杠  
主盟騷雅樹旌幢  
風過禁籞傳清漏  
月轉花衢吠小尨  
已見明時無滯獄  
何妨良夜倒春缸

慚予進退俱無補  
祇合荷衣釣石缸

右次屠  
元勳韻

十年徑草笑無媒  
自分餘生已矣哉  
失計入隨新宦牒  
幽情常戀故山梅  
紅塵祇覺添華髮  
舊業惟應長綠苔



拭目看君上寥廓法星光彩映三台

右次洪宣之韻

題紫菜圖

柔叢細感紫羅紋歷盡冰霜亦自春更有一般清絕味  
嚼來滿鼻散芳辛

題畫芹菜為李少叅士元賦

何人洒墨寫芳芹眼底猶疑散苾芬叅看一心堪贊理  
不須持此獻明君

神農品第列佳蔬一種清香風味殊冰蘖知君恒自勵

飽餐應不羨甘腴

壽姊夫林君并姊氏七十

多君訪我到洪州  
白首還能賦壯遊  
自有神仙在  
人世何須方外問丹丘

同胞猶幸兩人存  
姊已稀年弟六旬  
獻壽末由傾綠醕  
空餘清夢到家頻

伉儷齊年七十餘  
承歡况復子孫俱  
緘詞遠寄南飛鶴  
相約蓬壺看海枯

乙卯重過圓通寺借宿再用夏提學韻賦一律

欲濯塵纓尚未能，匡廬又見碧層層。  
半生牢落空憐我，一味清閑却讓僧。  
周覽未酬霞外想，長吟聊伴佛前燈。  
重遊更與山靈約，只恐萍蹤不可憑。

南安行臺賦古梅

兩按郡皆遇梅開甲寅重臨  
樹半枯而花猶自若紀二絕

橫浦行臺有老梅，看花今是第三迴。  
浮生莫嘆容顏改，鐵幹冰姿亦半摧。

鐵幹冰姿亦半摧，入門為爾重徘徊。  
獨憐不改堅貞操。

依舊寒花冒雪開

登上清宮鶴歸亭用趙松雪韻

攬衣一上鶴歸亭外竒峰晚更青無計可能醫俗病  
矢心期不愧山靈清音度曲鶯啼樹碎影搖金月底  
欲拂瑤琴奏山水子期已去復誰聽

遊僊巖亦用前韻

風景依稀似幔亭懸崖峭壁絕丹青請看石竇函遺蛻  
可是神仙尚有靈華表不聞歸白鶴道人空自誦黃庭

山禽似喜遊人至樹底和鳴亦可聽

走筆題扇送方恒謙行人之京

十年江海嘆離羣纔得逢君又送君  
明日高樓凝望處幾重山水幾重雲

題白蓮

蓬島仙姝淺淡粧翠旌羽蓋渡滄浪  
鏡奩不是無朱粉羞與奸諛比六郎

閩江觀漲

閩山春雨積旬餘  
新漲盈江混太虛  
行客朝迷山下路  
漁舟夜繫竹間廬  
鳥飛烟靄冥濛裏  
人在乾坤混沌初  
愁聽村農相告語  
傍溪田圃半沮洳

遊鍾山和同寅潘應昌韻二首

紅塵十載走金陵  
偶共尋幽適性靈  
山色自應千古在  
人生能得幾迴經  
蒼松棲鶴看尤好  
碧澗潛蛟飲覺腥  
一段風烟堪入畫  
誰言蓬島隔窮溟

我來撫景無窮思  
安得長繩繫曜靈  
白鷺洲空潮自去

烏衣巷古燕還經六朝事業浮雲盡千載江山戰血腥  
聖代乾坤寧謐久洗兵何用倒滄溟

再和同寅潘應昌遊鍾山韻三首

丘隴高低六代陵誰將尊酒酌遺靈蝕殘斷礎荒苔合  
剝盡豐碑野燒經樵唱幽林空谷應漁歸芳渚晚風腥  
英雄割據成何事依舊青山枕翠溟

帝業天開形勢壯望中濯濯著威靈山連吳楚周遭繞  
江發岷峨迤邐經夷夏有歸供職貢犬羊無地肆羶腥

千年王氣今全滅累洽重熙莫八溟

泉石幽竒愛秣陵卜居擬訪草堂靈  
鯤梅細和逋僊句  
種茗閑看陸羽經醉裏玉山能自倒  
世間銅氣任渠腥  
浮生此計何當遂誰問飛塵竭九溟

挽餘姚黃處士夫婦

同寅九成廷  
平祖父母也

同閨昇平九十年蓬萊相繼夢遊仙  
鄉評共說梁鴻好  
閨範還稱德曜賢棋局畫閑花嶼上  
機聲秋斷畫堂前  
賢孫霄漢鍾餘慶指日焚黃賁隴阡



重九同年戴大節諸君登臺賦詩病中示次韻


身如病鶴未能飛  
聞道羣公集翠微  
料得清尊能縱飲  
肯教黃菊笑空歸  
山添新翠初經雨  
鴉帶殘紅欲落暉  
却憶去年多樂事  
故山傾倒卧苔衣

和同寅黃九成棘寺言懷亦用前韻

公餘仰見白雲飛  
身外浮榮頓覺微  
世路風波隨處險  
天涯萍梗幾時歸  
乾坤舉眼成何事  
歲月無情易落暉  
况復元規塵滿面  
西風無地拂征衣

送楊郎中愷之叅議廣西

萬里雲山是桂林都門雪霽馬駸駸聲粉暑年華久  
佐政薇垣寵眷深瘴厲須憑甘雨散疲癯還望福星臨  
此行上德敷宣徧定有殊勲簡帝心



朱軒文集卷十

欽定四庫全書

集部  
未軒文集卷十一

詳校官中書臣賈鉞

中書臣劉源溥覆勘

總校官庶吉士臣倉聖脉

校對官中書臣吳甸華

勝錄舉人臣張曾秀

欽定四庫全書

未軒文集卷十一

明 黃仲昭 撰

七言詩

甲午季冬雨雪連旬公餘感觸輒賦八絕

琪花誰散滿林端  
一夜鍾山失翠鬟  
上下清光相掩映  
乾坤都在畫圖間

道傍甲第是誰家  
金帳羊羔興正賒  
棘寺郎官清透骨

自敲冰片煮春茶

茫茫積雪遍山川  
瘦馬衝寒敢自憐  
應有閉門僵臥者  
甌無炊黍突無烟

匡時事業了無成  
牢落風塵笑此生  
却羨灞橋驢背客  
無端風味助吟情

一雪旬餘曉暫晴  
晚雲旋復結濃陰  
村農初喜春宜麥  
麥隴今嫌雪太深

寒威入夜徹吟幃  
布被無溫酒力微  
誰念三邊征戍苦

滿天風雪臥戎衣

要路諸公寵祿兼  
紅爐熾炭酒頻添  
迂踈只合長清冷  
案牘時呵凍筆簽

青山雪後可尋春  
欲謝微官未有因  
聞道村橋梅已發  
看花酌酒屬何人

題進士起家卷

吳先生彥賓由省元進士拜禮部  
郎瞻瞻先生題扁云云因賦此

龍頭鼻祖家聲舊  
又見聞孫起盛時  
筆健應扛汾水鼎  
才高獨占邠林枝  
宸聰快覩天人策  
睿眷榮超禮樂司  
故

物青氈今尚在繼承還為後人期

送王主事世英還朝次翰林諸公餞別聯句韻

萬里東甌駕使驂春風歸路過閩南囊中不著新增物  
篋裏惟存舊賜衫十載論心情最劇半生憂國意猶酣  
還朝若問經行俗為道流殍澤未覃

壽仙溪張母吳氏七十次周翠渠韻

舞袖爛斑曉日前慈闈尊酒賀稀年長生莫問還丹訣  
種得瓊芝滿石田



題仙溪遊鶴軒次周翠渠韻

林木陰森林草萋林塘一鶴獨幽栖  
簷端飛起茶烟暝雲際歸來巖日低  
聲挾天風聞更遠舞當庭月望還迷  
祇應長伴蓬仙侶誰羨趨朝候曉雞

辛酉二月二十日晨起訪雲峰即事

曉訪雲峰認舊蹊種松擬築壘窩栖  
溪雲蕩漾浮山足石徑峻嶒怯馬蹄  
紳笏久羈真自誤林泉勇退未終迷  
年來頗得蒙莊趣天地蜉蝣一視齊

致仕過常思嶺蘭若和故友彭從吾韻二首

引年得請荷清朝報答慚無尺寸勞  
吾道自難酬素志  
愚衷空復戀青霄  
百年世事心俱懶  
兩眼雲山興未消  
偶讀從吾舊題句  
九原無路起詩豪

鄉山動是十年思  
今日重過一賦詩  
黃菊相看如舊識  
白雲未許笑塵姿  
鳥鳴翠竹尤深處  
鶴立蒼松最上枝  
我亦歸尋舊栖隱  
開尊冷看世途危

贈大田驛丞彭籍三首

安福人字經典二  
彭閻老之族子也

先人昔日教安成我在黌宮解裏生  
垂老又經司學政  
安成人士獨關情

大田驛舍偶逢君問是安成宦族孫  
空谷足音心自喜  
平生迹異底須論

一官山館使車稀公事無多足自怡  
委吏乘田遺訓在  
立身元不論崇卑

大田驛和林元佐地官留題韻

此地經過知幾回山靈應笑我重來  
吟春幽鳥寒猶澁

帶雨頑雲濕不開  
恤政未沾桑下餓  
閑愁空切杞人懷  
百年畎畝餘忠在  
豈逐衰殘沒草萊

賀延平劉宮保得男二首次林見素韻

鬱葱佳氣絢晴霞  
維岳鍾英少保家  
湯餅筵開春意藹  
沉檀香裊煖烟斜  
靈椿雖老尤增翠  
萱草從今更著花  
天上麒麟重孕秀  
徐卿二子未須誇

劔水深蟠雙翠虬  
靈鍾人物軼常流  
光前骨相由天定  
裕後休祥自己求  
怡養行看翻彩服  
蒸嘗有待薦嘉羞

百年宮保書香在繼武還修五鳳樓

壽仙溪李朴菴夫婦七十次陳待徵郎中韻

高堂春酒莫辭傾此夕孤南星正明萊服頻翻娛綺席  
南陔新譜入瑤笙西來王母蟠桃熟東望函關紫氣橫  
壽域無涯纔七十蓬瀛還看海塵生

挽三山張澹大尹

鄉試同年歷訓導陞知饒平縣承檄率民兵勦寇卒於師

昔年同聽鹿鳴歌浮世光陰轉眼過白髮盈顛嗟我老  
黃泉無路奈君何片宮化雨英髦盛花縣春風惠澤多

獨恨行營星遽殞鯨鯢未覩伏天戈

送郡守陳公入覲

老來送別易銷魂况復今朝別使君霖雨已看蘇赤子  
餘波還喜及斯文關河白鴈秋驚夢閩闔踈星曉奏勲  
後夜月明天萬里空依北極望紅雲

題張叔著桂林書院中曲水流觴次鄭東園韻

桂林風物擅幽竒此日追隨一憇之水有淵源流易滿  
杯行結曲到應遲鶯調簧管來深樹膾切銀絲出別池

浮世茲遊須盡興，萬牛難挽歲華移。

題鎮海朱大尹漁樵耕牧圖次翠渠韻

乾坤何處是通津，謝却浮榮避俗塵。  
漁笛數聲芳渚暮，樵歌一曲碧山春。  
高秋禾黍遍層隴，落日牛羊歸四隣。  
架有琴書尊有酒，何須蓬島覓仙人。

題守拙卷

仙水陳熙春名其藏修之室曰守拙因以自號

高隱林泉遠市朝，半生守拙臥衡茅。  
浮榮有分從吾好，世事無機任俗嘲。  
襪雀讓教稱巧婦，斑鳩自合寄成巢。

知君妙契濂溪賦豈向清時作繫匏

送宗姪孫道進任新會教諭次同年李若虛韻

年來謝却白鷗沙榮捧除書出帝家  
遙想振揚文教日春風開遍杏壇花

吾家文獻自唐開未羨床頭笏滿堆  
此去譽髦期不忝青氈還付與雲來

題仙溪張氏一樂堂慶壽圖

靈椿萱草並鮮妍玉樹芝蘭復滿前  
共倚蓬壺看春色



從教滄海變桑田

和方友允迪六十自壽詩

允迪自號履素

壽酒年年宴此晨未論腰帶綰黃銀人無豐約閑應好事有乘除樂亦均素履不渝從我好世途寡合任渠頻  
笑紛紛華要曾何補誰謂儒冠真誤身

題周憲使公載歸來亭次壁間韻

小亭依約水晶宮四面澄波可鑑容槐蟻夢隨殘月曙  
尊鱸興繞白雲重憂時畎畝餘忠在結社林泉樂意濃

我欲亭中分半榻，閑看孤鶴舞蒼松。

挽贈監察御史董闕

夫婦僉憲豫太守  
復之父母也

一雙白壁闕青山，逝水東馳不復還。  
人世有天數，慶澤泉臺無路接。  
清顏鳳毛碧，漢雙高翥鸞。  
誥彤墀屢渙，頌墓石慚子辭。  
不裴足留潛德，示人寰。

送曾郎中謝病還鄉

半生塵土鬢成絲，謝事還家竟不疑。  
陶令謾因黃菊去，留侯曾與赤松期。  
閑來軒冕應無夢，到處溪山定有詩。

我未別君君別我江東回首不勝思

具慶堂詩慶林李瑞稅使伉儷壽六十

木公白髮岸烏紗金母酡顏映紫霞老眼摩挲看流轉

桑田漸滿海東涯

右次林太守韻

甲子年來又一新人間還看幾回春仙翁雲外傳消息

已注長生錄上人

右次吳憲副韻

送望江教諭伯清先生乃兄還莆

春草夢殘勞北上松楸望斷復南歸往來總繫綱常重

一任風塵敝客衣

兩京飄泊幾星霜却喜逢君話故鄉  
潮水不知離別苦又從江上送歸航

送道士還鄉

孤蹤無礙任西東一片閑雲寄碧空  
賣藥暫游都市裏尋真又入故山中  
蘭橈夜泛鷗邊月鐵笛晨吹鶴背風  
惆悵舊遊歸未得天涯翹首送冥鴻

題怡閣卷和都察院經歷黃仲胤韻

聲利勞人鬢易斑紅塵終日走間闕始知廊廟千鍾祿  
不及丘園一味閑載酒日遊花嶼上攜書時向竹林間  
因君便欲辭軒冕風月平分數畝山

絕句二首招諸友遊東巖

一春強半雨中過節過清明日始和垂老看春知幾度  
乘春不飲欲如何

細君手釀已新篘準備尋春作勝遊明日東山修禊事  
不知諸友肯從不

題夏太常竹送周翠渠知廣德州

天上清卿寫竹工分明淇澳雨中叢  
贈君去作鄆城守  
德業期同衛武公

上苑琅玕高百尺天恩浩蕩飽曾沾  
一枝帶得鑿坡雨  
洒向南州散酷炎

郡在靈南山秀中篔簹遶含翠陰濃清負太守庖無肉  
春雨猶能救籜龍

挽陳教授先生廷威

乾坤俯仰嘆斯文眼底何人更似君一代才名追鄭老  
百年科第屈劉蕢經橫絳帳春風藹人去詩壇夕照暝  
舊日林塘重過訪數聲隣笛不堪聞

挽摘泉方文謨先生

八十高年強健身西風一夜殞莊椿黎元正爾多奇疾  
天地胡為奪此人橋井泉深空自冽杏林花發為誰春  
刀圭我亦曾蒙惠一束生芻淚滿巾

下臯雜詠

金石錄卷之八十一  
卷十一  
水石陰森烟月清山中事事可怡情始知世路閑榮辱  
真與浮雲一樣輕

山徑荒涼月上時郡僚奔走迓監司道人引水澆畦罷  
坐燎松明改舊詩

豪氣衰年未盡降每因世事熟柔腸山莊來往惟農父  
長話桑麻心自涼

十畝山田種稻梁茄秧新乞自鄰鄉雖無鐘鼎供遊燕  
且免紅塵請謁忙



何處偏宜養性靈無端野趣在林扃  
開簾猶恨前鄰樹  
遮却遙山數尺青

山莊誰道不繁華桃李逢春解著花  
秋至未應全落莫  
芙蓉新種已抽芽

春雨初過水滿川神祠簫鼓正祈年  
我來亦欲隨鄉俗  
急典春衣入社錢

春風一夜到桑麻嫩葉柔枝漸次加  
曉起喜聞童穉語  
新移丹荔亦萌芽

一川桑柘隱烟霞黃菊蒼松自一家更喜舍南添隙地  
開渠占斷白鷗沙

日食何須貳肉腴新栽杞菊已扶踈小池更引清溪水  
春雨應添數尾魚

殘書讀罷啓房櫳散步東風遣病慵門巷翛然籬落矮  
隔鄰遙見夕陽春

未甘奔走混風塵買斷青山學隱淪牟麥登場蠶作繭  
林泉終老未須貧

芳村疎雨送微涼  
倚杖村南看插秧  
真趣滿腔誰與語  
起呼尊酒酌柴桑

塵寰無日是安居  
喜遂山林寄一區  
讀易倦來無外事  
閑看梁燕哺新雛

麗日和風雨乍過  
一丘一壑足婆娑  
薄田有粟身無恙  
天地私吾亦已多

興到展書談舜禹  
倦來拂枕臥烟霞  
箇中無限悠然趣  
絕勝霜臺曉放衙

性與時違事事差生涯只合付桑麻看來富貴由天倖  
傳到兒孫有幾家

鄉民水旱苦相仍征斂無期立取盈我亦呼兒急稱貸  
令人惆悵憶陽城

蒼松黃菊纔三畝流水柴門自一家却悔平生都失計  
坐聽官鼓踏霜華

輞川佳勝古來稀猶欠吾莊一段奇丹荔子栽今結實  
薰風滿樹絳囊垂

近日山君猛且饕踰垣入屋攫牲牢均不復生今世  
誰遣深山滅迹逃

世途得喪見交情徑路蕭蕭草自青惟有梁間雙燕子  
年年依舊訪柴扃

性癖情知與世殊祗應歸臥故山廬山中亦有經綸事  
朝課耕桑夕校書

閑來事事覺從容始信山林可養慵悔殺昔年成底事  
紅塵鞭馬聽朝鍾

贈三山太守唐侯廷貴

閩江縹緲漾晴波，爭似君侯惠澤多。  
玉雪襟懷涵霽月，冰霜崖谷轉陽和。  
閭閻不識催租吏，田野時聞擊壤歌。  
聖代循良應有傳，姓名指日入編摩。

挽溫方伯琮

使君一夢躡仙蹤，閩海家家輟相春。  
廊廟有人思貢禹，泉臺無路起元龍。  
紫薇花底春風老，棠樹陰中草色濃。  
一束生芻從此別，蜀山回首暮雲重。

題林君叔孟秀遠亭二首

前次吳時望先生韻  
後次鄭廷綱內翰韻

繫馬幽亭久未旋  
亭前景物各爭妍  
倚天晴翠千峰出  
遶郭蒼烟萬井連  
花影亂侵徐孺榻  
鶯聲巧和伯牙絃  
因君欲買西鄰地  
風月平分過暮年

小亭新結傍幽蹊  
窓戶平臨翠篠齊  
宿雨收殘山靄濕  
浮雲飛盡海天低  
樹連睥睨參差見  
花隱房櫳咫尺迷  
安得筆端生五色  
盡收佳景入新題

題淵明像

與午乾坤已莫支一官豈為督郵辭壯懷激烈無由寫  
盡付東籬濁酒卮

題劉伶像

百年縱酒樂天真荷插青山處處春莫怪先生終日醉  
乾坤誰是獨醒人

和惠安張大尹登最高峰韻二首

海天森列總雲峰盡在僊郎眺詠中聖主牛刀教暫試  
不須凝望紫宸宮



遶邑誰當第一峰  
茲峰獨出萬山中  
何時麾却塵寰穴  
來借巖阿半畝宮

墨竹二首為林信傳賦

誰種琅玕傍碧溪  
森森高節與雲齊  
春風養就林間實  
留待丹山彩鳳棲

籠葱翠玉擅風標  
白石清泉伴寂寥  
安得伶倫裁鳳管  
五雲深處和簫韶

文峰書樓為陳文珍賦

亭亭文筆玉嶙峋下有層樓廻出塵四壁芸香浮汗簡  
三更藜焰逼穹昊元方別駕聲華舊小阮黌宮教澤新  
寄語雲仍宜努力莫教家學負前人

南溪別業次韻

刺桐花下有華堂別買溪南數畝莊旋剪荆榛開町疇  
更添亭館帶林塘春嵐壓地苔花濕暑雨蒸林荔子香  
自笑一生纓冕累無緣來共白雲鄉

林雲山益梅九月盛開魏竹溪有詩次韻二首

闕

處有盆梅九月寒花的爍開占取孤標尋菊

闕

挽將春意入秋來天教早實調金鼎人喜揚芬滿栢臺  
三弄瑤琴豪興發未應何遜擅吟才

江南臘月見疎梅此樹高秋已盛開東閣酒醒驚雪早  
羅浮夢覺訝春來西風入戶香浮几涼月當空影滿臺  
欲為花神重作賦廣平人去愧非才

下皋俱樂部亭扁

致政歸作小亭取邵子滿目雲  
山俱是樂一毫榮辱不須驚句

十載山莊沒草萊小亭今日喜新開呼童痛洗亭前竹

要放南山翠色來

滿目雲山俱是樂古人心與我心同紛紛寵辱多憂患  
真樂誰知在此中

開亭近對九龍山人在千林紫翠間造物於吾多所靳  
惟應山水不吾慳

十年失脚走危途天賦吾真半已蕪今日看山亭上坐  
悠然始復見真吾

亭前無地著塵氛雲外青山山外雲頗幸名途抽脚早

山靈猶未作移文

九龍山勢鬱嵯峨  
翠入簾櫳爽氣多  
讀罷殘書無一事  
閑調綠綺和樵歌

亭外羣山翠遶簷  
看山終日坐鈎簾  
東南天際浮雲盡  
又喜壺山露一尖

列岫多情爭秀麗  
野花隨意放芳妍  
化工還有些兒欠  
背却西淙瀑布泉

煙雲變幻多奇態  
風月清妍無盡期  
莫道吾亭欠華彩

天然圖畫列階墀

瀟洒林亭僅數椽  
包羅風景迴無邊  
夜來微雨兼秋至  
徹骨清寒疑欲仙

題仙溪陸世徵活水亭次郡守丁石崖韻

亭前靜坐暗聞香  
活水流花入小塘  
聞說箇中長若此  
幽竒不獨在春陽

宣父當年嘆逝川  
眼前道體浩無邊  
與君說到淵微處  
須向源頭一放船

慶鄭敏善先生年八十應詔冠帶

年躋八秩未龍鍾又沐清時寵渥隆  
華髮謾添烏帽雪  
酡顏不藉錦衣紅  
已看敬老循周典  
還見優賢有漢風  
况遇聖明弘治日  
蒲輪早晚召申公

送司訓鄭先生啓善之任

萬里巴川育俊髦  
一身許國不辭勞  
明朝無復聆清訓  
今日休辭醉綠醪  
猿嘯溪頭驚客夢  
山橫馬首助詩豪  
傳經絳帳應多暇  
一曲瑤琴夜月高

己未端午同吳繼學方子大諸君遊東巖二首

名途十載抱離憂  
此日重欣結勝遊  
山色不隨人事改  
煙光似為客來收  
底須身外論豐約  
且向尊前共唱酬  
薄暮微涼城上路  
也隨時俗看龍舟

炎歊何處滌塵憂  
共約東山寺裏遊  
一鳥不鳴山更寂  
千林增翠雨初收  
老身猶喜康強在  
佳節須將酌酎酬  
請看羣龍紛競渡  
誰憐野水有橫舟

題墨菊一首為延平通守金孔深賦



楚楚黃花絕可人  
曉來含露色尤勻  
莫教輕泛柴桑酒  
留取芳泉壽釵民

偶成

蕭然一室無餘物  
短劔孤琴是舊知  
閑裏偏嫌人事擾  
夢中亦怯世途危  
久違故舊緣多病  
斷送光陰賴有詩  
天命窮通皆一定  
且傾尊酒不須悲

別東巖偶成三首

東巖一到覺心清  
便與高僧共結盟  
寶地不堪今又別

山光樹色總含情

世事紛紛役此身  
林泉無計日相親  
山靈應笑今歸去  
依舊胸中萬斛塵

斜陽惆悵別招提  
吟逐寒雲度虎溪  
黃鳥似知人欲去  
蒼松枝上盡情啼

馬嵬三首集句

直北關山金鼓振

唐杜子美

英雄無策庇嬋娟

詩一

朝艷質

化塵土

元音薩天錫

明日何人拾翠鈿

元音楊鵬翼

風散綵雲飄

碧落詩類苔生輦路濕蒼煙元音柯敬仲明眸皓齒今何在唐杜

美子滿眼梨花哭杜鵑詩韻

千里佳期一夕休李益三體詩空餘涕淚洒清秋光岳華庚伯生

魂歸遼海雲迷樹元詩體要賈策夢斷江城月滿樓光岳華庚伯生毛

骨已隨天地老元音貫雲石江山空結古今愁元詩體要燕敬長生

殿古生青草宋蘇子瞻七夕何人望斗牛唐音李從一

瀟瀟踈雨響殘除光岳華辛敬壯士吹笳慘不舒光岳華庚伯生

白玉帳寒鴛夢絕鼓吹宋筮蒲萄衾冷夜窓虛元詩體要辛文房碧

雞祠下杜鵬叫

元音虞伯生

白帝城邊古木踈

唐音高連夫

海濶

天高不知處

唐音劉瑤

蓬萊何日候僊車

光岳英華釋來復

姑蘇懷古二首集句

吳王醉處十餘里

二體詩羅隱

燕語鶯啼空斷腸

元音李冶 霸業

已隨煙燼滅

宋曾子固

淚痕滴透碧苔香

元陳剛中

彩鴛靜占銀

塘水

鼓吹胡宿

密雨斜侵薜荔牆

唐柳子厚

惆悵無因見范蠡

三體

詩杜牧之

五湖煙浪正茫茫

元詩體要張翥

西施去泛五湖舟

剪燈新話

萬紫千紅夢已休

元詩體要周石原

故

國盡消龍虎氣

元音陳  
剛中

殘蟬如說古今愁

詩韻

桂房椒壁

蕙蘭老

元音胡  
尊生

金沓瑤琴鹿豕遊

元詩體要  
趙子昂

故事悠悠

不可問

唐音司  
空文明

往來惟見水東流

唐音高  
遠夫

和林君時恭山居韻四首

春入池塘草色新  
吟邊魚鳥覺情親  
雨餘澗水流花出  
恍惚桃源洞裏人

入夏林端荔子新  
開尊時與故人親  
有時笑傲蒼松下  
閑看紅塵得意人

小槽釀出綠醪新  
溪叟山翁笑語親  
吟對黃花無別事  
悠然塵外一閑人

萬壑千峰積雪新  
閑中詩酒鎮相親  
興來獨步溪橋月  
笑與梅花作主人

題老子授尹喜道德經圖

嘆息淳風日已淪  
深探性命著微言  
當年不授關門尹  
萬古誰知道德尊

題張良進履圖

天挺人豪遇下邳，留侯遂作帝王師。  
秦關百二山河破，應是胚胎進履時。

題鍾呂傳道圖

傳得壺天却老方，茫茫八極任翱翔。  
顏齡若使真能制，大濟蒼生總壽康。

題張詠謁陳希夷圖

墜驢大笑西歸去，買斷華山一段雲。  
浮世知心獨張詠，無邊風月欲平分。

題子期聽伯牙鼓琴圖

不因鍾子獨知音  
山水徒然托意深  
千古高風招不返  
傷心弗忍撫瑤琴

題扇面小景

陰陰綠樹散清涼  
扶醉同消夏日長  
一段溪山看不盡  
浩歌相對任斜陽

題釣臺圖

光武中興網俊才  
先生晦迹隱蒿萊  
雲臺寥落成榛莽



萬古猶傳舊釣臺

挽丁通判

早擢魏科立要津復承恩命倅南閩寸心清奪冰壺月  
一氣噓回寒谷春遼海不堪仙鶴去棠陰空見碧苔新  
黎元借寇今無地惆悵西風淚滿巾

唐宮人題紅葉圖詩二首

芭蕉庭院獨徘徊一片秋襟鬱不開不是霜紅隨逝水  
深宮何處托良媒

曉來梳就綠雲鬟踏破香苔滿院斑無限芳情共誰說  
願憑紅葉到人間

鯉湖紀遊十首和先輩龔司訓韻

瘦筇吟倚上苔梯路入深林望轉迷料得仙宮應不遠  
白雲深處午雞啼

清湍數里逶迤來遶向仙宮一鑑開身世分明方外境  
誰言弱水隔蓬萊

泱泱泉流濺石虹青青瑤草臥僊龍道人洞裏朝元去

看院惟留鶴一雙

芒鞋遠謁洞中天只為雙親已暮年此意羣仙如洞鑿  
今宵好夢願相傳

幽潭百尺衆流鍾下瞰深崖一脉通勝槩應從天地闢  
人間風景迥難同

丹成八表任遨遊丹竈空存幾度秋欲丐靈丹換凡骨  
不知僊子肯從否

簾捲珠宮月滿床清風細細裊爐香病軀無計堪調攝

安得還丹一粒嘗

寒流幾派瀉層湍  
聲撼長空去不還  
夜半忽驚清夢覺  
却疑風雨響琅玕

山色摩空勢欲齊  
時聞幽鳥隔雲啼  
新詩吟就無窮趣  
起向琅玕節下題

風光端不讓天台  
百尺珠簾映日開  
寄語道人留半榻  
功名債了擬重來

送樊掌教乃兄邦本歸常山

難弟承恩司欽鐸迢迢相送入南閩客窓風雨連床久  
故國椿萱入夢頻馬踏暖雲芳草路帆衝晴靄綠楊津  
遙知獻壽高堂上白髮雙親滿面春

明妃詞六首

愁抱琵琶別玉除可能談笑鎮西都宮中多貯如花女  
勝築長城萬里餘

風起遙天滿面沙舉頭何處望中華早知身被丹青誤  
但嫁巫山百姓家

金史卷之二十一  
卷十一  
長擬承恩老漢宮誰知騎馬出秦中  
祇緣命薄應無怨  
聖主何須殺畫工

宮衣拭淚出金鑿  
萬里邊風拂面寒  
舉目不堪風土別  
夢魂夜夜遶長安

單于慰藉恩雖厚  
異域荒涼心自悲  
惟有庭前清夜月  
相隨無改漢宮時

八夜單于初罷獵  
雲鬟強整出宮迎  
馬前歌管聲嘈雜  
不似長楊舊樂聲

寄華巖寺默堂上人詩四首

乘閑特訪默堂師何處遊方負所期  
林鳥潛窺山殿供野猿偷動石枰碁  
碁收殘藥空流水夫訝遊人吠短籬  
欲問三生緣內事相逢未卜是何時

萬木陰中梵宇開分明人世有蓬萊  
漾開池藻羣魚戲點破松煙一鶴回  
澗水浮花雲裏出山風如雨竹間來  
高僧不遇徘徊久踏遍蒼蒼滿院苔

夏日尋幽到上方清陰滿地午生涼  
雨過山色重重好

風度荷花陣陣香詩景百般行處有塵緣萬種坐來忘  
雲扃叩遍無人見惟有殘書滿石床

問師飛錫遊何處自是閑雲任去留滿院幽花空冉冉  
一溪流水自悠悠半生苦海無緣濟何日空門結社遊  
回首城南忽相遇一尊重約醉清秋

題府學正蒙齋巽宮春曉圖

泮水三春破曉時無邊和氣襲人衣研硃細滴花間露  
散帙初開竹外扉壇杏影斜殘月墜雞窓聲動曙光微



人生所學惟忠孝努力相期共不違

題葡萄為林君伯正賦

老藤偃蹇露顆懸恍惚驪龍抱珠眠只恐風雲一朝會  
奮迅直上蒼蒼天

題葡萄次羅良齋韻

移根大宛渡滄溟風雨園林幾晦冥半夜月明送清影  
龍蛇散亂走空庭

題睡漁父圖

欽定四庫全書

宋軒文集  
卷十一

七

孤舟穩臥蘆花裏  
占斷滄浪一段雲  
莫向江湖輕釣客  
太公千古樹奇勳

蒜嶺道中偶成

驛樓鼓歇曙蒼蒼  
行傍花陰曉露香  
獨倚征鞍探勝景  
無邊詩思攪人腸

錢塘懷古

鳳凰山勢翠岩堯  
草樹荒涼王氣銷  
二帝魂歸江月冷  
六宮人去海天遙  
英雄千古埋黃壤  
臺榭三春長綠苗

惟有鐘聲應似舊朝朝暮暮送寒潮

登甘露寺多景樓二首

闌干百尺倚層霄風景無端入望遙  
島嶼勢從滄海斷樓臺影落碧波搖  
青山遶寺自千載芳草緣城鎖六朝  
弔古傷心吟未就疎鐘殘照送歸潮

江南江北景無窮都入危樓一望中  
霸業荒涼天地老山河盤踞古今雄  
丹陽雨至雲連樹瓜步潮平浪拍空  
野鳥似知前代恨林端哀怨泣西風

赤壁詩次韻

阿瞞志欲捲羣雄戰艦誰知一炬空  
天意欲教成鼎峙  
不須惆悵怨東風

金臺早行

數村行過始聞雞  
星斗依稀月滿溪  
遙想故園人正睡  
梅花影落小窓西

晚過涿州

青山冉冉夕陽浮  
綠樹微茫見涿州  
白鴈聲寒燕塞晚

丹楓葉落薊門秋  
漁舟蕩漾歸江浦  
畫角淒涼起戍樓  
黃帝虫尤俱寂寞  
眼前贏得水東流

過蘆溝

一水中橫斷市廛  
酒旗高裊綠楊煙  
行囊只有詩千首  
不畏關門索稅錢

夜夢老母因不寐偶成

別却慈親天一方  
夢魂夜夜遶萱堂  
覺來腸斷難成寐  
數盡更籌夜未央

癸酉仲秋得老母家書有感

慈闈一別幾寒溫冀北閩南總斷魂昨日音書憑鴈到

分明珠闕闕成痕

客中秋夜

秋夜淒涼只自憐壁蟲窓月伴愁眠西風不識人憔悴  
亂送砧聲到枕邊

寄羅公巖親家

天涯為別幾秋冬南望閩山思不窮烟樹春天迷渭北

寒雲日暮起江東鄉心最怕看明月客夢偏驚聽斷鴻  
安得相逢一攜手論文尊酒對春風

詠菊

東籬一夜花開遍能使秋光勝似春香逐金風偏馥郁  
色滋玉露倍精神月中恍惚楊妃笑雨後分明西子顰  
試問顏齡端可制慙慙摘奉白頭親

寄表姪陳宗調

鄉園數載每同歡別後寧知會面難尊酒無由花底共

瑶琴空憶月中彈  
江南夢斷鶯聲曙  
冀北魂銷鴈影寒  
遙想芸窗經史暇  
寒梅開處帶吟看

立春日霜降草木皆白戲成

殘鴈應隨寒漏盡  
新春又逐曉鐘來  
天公似報春消息  
亂剪瓊花到處開

立春日偶成

土牛鞭下已飛塵  
律轉三陽歲復更  
鳥雀亦知春信好  
碧梧枝上不停聲



春日滹沱即事

即光武迫於王郎所渡之處

窮方三月始知春一騎尋芳滹水濱  
牧笛數聲青草岸流鶯百轉綠楊津  
催花細雨濕吟袖飄絮微風歆醉巾  
欲訪當年冰合處蒼波萬頃碧粼粼

秋夜漫興

柴門半掩夜方深獨坐空庭自在吟  
菊影重重侵碧檻風聲颯颯起疎林  
愁懷盡付三杯酒逸興都歸一曲琴  
塵世勞勞俱是客不須對景獨傷心

題陳太守抱甕亭

瓦甕澆蔬手自携  
漢陰老圃是吾師  
靈扁春意長無恙  
世路機心總不知  
狡兔謾勞三穴巧  
痴鳩甘守一巢危  
願公且未投簪去  
坐鎮民風息險巇

園居六詠為河南方伯豐公慶賦

水環碧帶

居旁有小河周匝四圍如帶

清流如帶環幽舍  
瀟洒無塵趣自多  
月上一團凝素練  
風生四面感青羅  
竹間自有通門處  
柳暗翻疑無路過

藩府正宜宣帝德莫思漁父共高歌

農畝躬耕

環園居皆平田將為歸老躬耕之所

遠舍茫茫百頃田深耕應可樂堯天綠簑二月西疇雨  
黃犢一犁北隴烟荷鍾長吟過柳外蒸藜炊黍餉林邊  
祇今天下需元老未許歸來學輞川

漁磯獨釣

居東局河岸有石磯亦可以為歸老取適之地

園居東畔有漁磯獨把絲綸趣不稀兩岸烟霞長作伴  
滿川鷗鷺盡忘機興來高詠滄浪曲心靜偏宜水月輝

此景知公常在念明時未許解朝衣

南窓琴趣

居南有軒薰風徐來可鼓琴以忘塵慮

南窓靜啓理瑤琴拂拂薰風入座清十指依稀鸞鶴舞  
七絃恍惚鳳凰鳴梅花奏處清吟骨白雪彈時絕俗情  
解慍願賡虞舜曲坐吟黎庶樂昇平

柳岸春風

居東沿堤種柳春風和煦可以遊息

繚繞長堤傍舍東千章綠柳裊春風乍經樹杪晴煙散  
細拂林端煖氣融藹藹柔條低弄影輕輕柳絮亂飄空

遙知此景堪行樂，應與風雲氣象同。

藕池秋月

居北有池秋深水  
月相映清光可掬

藕池秋夜靜沉沉，月上層霄分外明。  
影透青蘋遊鯉散，光臨紅蓼睡鷗驚。  
金波蕩漾微風度，玉鑑澄涵碧水平。  
對此想應心有契，月同皎潔水同清。

日暮西山即事

晚風緩步水雲村，景物無端役客魂。  
霧擁碧岑螺髻濕，風生滄海雪花翻。  
湄州漁艇初歸浦，禧水人家半掩門。

獨倚長松吟未就  
梨花疎雨送黃昏

禧江晚眺

江頭二月草萋萋  
吟倚東風望欲迷  
日落海門煙水暝  
雨收江浦樹雲低  
潮頭生自涓州北  
山勢來從禧水西  
景物役人歸路晚  
馬蹄踏碎落花泥

登天妃廟朝天閣

扁舟乘興訪涓州  
獨向朝天閣上遊  
鐘送清聲聞兩岸  
樹移寒影落中流  
雲開平海見譙樓  
潮益禧江度客舟

吟倚闌干清不斷  
天風吹起海門秋

遊城南靈巖寺四首

用壁  
間韻

偶乘清興扣禪門  
碧靄深中一逕分  
響雜梵經風入樹  
暝侵色相石生雲  
三千佛界中天見  
百八鐘聲破曉聞  
景物役人吟未就  
輕烟踈雨澹餘曛

風景無端擁寺門  
望中山色幾重分  
泉聲滿室長疑雨  
樹影當窓半是雲  
一派禪房依澗轉  
數聲清磬隔林聞  
靈巖一百二十寺  
多少樓臺鎖夕曛

古寺蒼蒼不計年到來擬結半生緣僧閑了悟空中性  
地僻分明物外天滿室香烟初起定一天花雨正談禪  
因知佛法多靈異鉢水能令出白蓮

雲巖一別幾經年此日重遊亦有緣祇樹陰森寒帶雨  
澗泉澄瑩碧涵天滿窓風月供吟句半榻烟霞伴坐禪  
乘興更登高處望好山四面削青蓮

奉和袁主事登甘露寺多景樓韻

飛甍百尺拱瑤京四望無端景象明霸業已知隨逝水



山光猶自役吟情  
草分野色綠城去  
風引潮聲入座清  
望裏天然方外境  
誰言弱水隔蓬瀛

奉和袁主事登虎丘寺浮圖韻

蘇臺鹿過水空流  
老樹荒烟鎖虎丘  
寶塔攀躋探古迹  
霸圖零落使人愁  
狂歌響振層霄上  
縱目長過萬嶺頭  
倚檻俯看飛鳥過  
分明身與白雲遊

奉和袁主事遊西湖韻

平湖四面遶孤峰  
萬頃無波一鑑空  
梵宇深藏青靄裏

浮圖高插白雲中錦衣濕處沾荷露畫舫搖時漾柳風  
遊遍六橋歸路晚夕陽斜抹半山紅

題扇面山水二首為林貴實賦

碧靄深中結草廬松風入座四窓虛山輝澤媚無窮趣  
疑有幽人此讀書

茅衡幾架隔遙岑萬壑嵐光結畫陰欲抱瑤琴訪清隱  
寒林無路白雲深

奉和姨夫方先生詠雪韻

陰雲黓黓布遙空六出紛紛四望同萬頃月華明徹夜  
一天柳絮亂飄風光涵寰宇山河外人在瓊瑤世界中  
三白由來嘉瑞兆黎元又喜際年豐

題林君長榮幽居和姨夫方先生韻

綠陰深處結幽居地僻依稀隱者廬  
遠舍半栽陶令菊滿窓盡積鄴侯書  
踏殘庭月夜吟句劇破畦雲曉種蔬  
教子暇時攜酒伴登山臨水樂何如

題扇面子猷訪戴圖

八夜懷人思不禁衝寒一棹度山陰興來歸去江雲暝  
門掩千峰積雪深

題林君惟華秋江獨釣圖和李君唐英韻

托迹滄浪識者稀海鷗汀鷺日相依投竿一笑寒雲暝  
世事無心任落暉

題蘆鴈扇和李君唐英韻

相呼相喚下回塘秋水蘆花一望長萬里雲霄身未達  
數聲嘹唳送斜陽

題屈原漁父問答圖

放逐江潭恨不平，偶逢漁父話衷情。  
可憐狂楚無情甚，竟使忠臣殞此生。

戲題鍾馗

曾向明皇夢寐中，手擒魑魅逞英雄。  
如何不斬姦邪首，縱使胡兒入後宮。

春深菊苗未發戲成

堪笑春風亦世情，菊畦偏後發生仁。  
工夫全向繁桃李。

未暇分來寂寞濱

方君景大家賞菊分題得錦菊二首

繁英千疊絕鮮明  
列向華堂最可人  
綵服舞時看不異  
詩囊近處認難真  
月中漏泄天機巧  
露裏分明蜀錦新  
摘泛霞觴香更好  
用斲慈壽等松椿

君家盛種一籬秋  
錦菊還誇異品流  
雨裏輕搖疑戲綵  
風前謾舞訝纏頭  
化機巧織塵難污  
湛露深沾色更幽  
歡賞百年能幾度  
不妨引滿酌金甌

送同年楊君赴春闈詩

河橋梅放雨初晴，榮捧鄉書上帝京。  
藩府已推魁八郡，大廷還擬冠羣英。  
蟲吟驛館三更夢，月滿蓬窓萬里情。  
遙想難兄相會處，對床風雨酒同傾。

送林君貴實赴春闈詩

久淬文鋒羨老成，喜陳三策上神京。  
馬衝寒雪閩山遠，帆掛微風浙水平。  
霹靂一聲龍化早，扶搖萬里鷁飛輕。  
瓊林宴罷如相憶，白鴈南來好寄聲。

題壺山惜別圖送友人周君歸三山

壺陽臘月梅花發  
花下吟詩一送君  
求道立殘門外雪  
思親望斷嶺頭雲  
旗亭此日難分手  
尊酒何時更論文  
明到故園如有憶  
音書無惜寄來勤

澄溪清隱

友人林君伯  
正為某索

久向澄溪賦考槃  
白鷗獨向靜中看  
四時風月歸詩興  
半世功名付釣竿  
遠引溪泉來稼圃  
閑開竹牖看雲巒  
醉鄉笑傲無餘事  
一曲狂歌宇宙寬



病中與鄭君思亨姜君思正索菊花二首

聞道君家菊滿籬無由一到賞芳菲  
夢魂忘却身猶病幾度吟敲花外扉

春初卧病及秋深籬菊闌珊碧草侵  
賴有故人相愛厚一株無惜慰憂心

謝友人惠錦菊月下白菊二株三首

今年全不見黃花對景荒涼祇自嗟  
應是秋光深遠我賴君挽得到貧家

鮮葩燦燦吐奇芬  
截得天機錦綺文  
病眼摩挲吟看久  
愁懷應減兩三分

繁英楚楚開寒玉  
應與蟾光一色清  
疑是羽僊初宴罷  
醉飛環珮下蓬瀛

春日卧病感懷

一臥經春祗自嗟  
無由散步訪韶華  
東風似亦欺人病  
吹落瓶中數朶花

首夏病中偶成

九十春光病裏過，不堪佳景盡蹉跎。  
兒童又向床前語，樹上青梅熟已多。

病中立秋偶成

春初一臥歷炎暑，又見新涼起天宇。  
西風曾不憐我愁，頻向踈櫺送寒雨。

題懸崖蘸水梅

金鼎調羹未有期，獨依幽谷擅清竒。  
夜深溪月弄清影，水底分明又一枝。

題扇面畫

扁舟閑傍綠楊汀  
濯足滄浪酒未醒  
鐵笛獨橫斜照裏  
數聲吹與水龍聽

未軒文集卷十一

欽定四庫全書

未軒文集卷十二

明 黃仲昭 撰

詞

送都憲秦公巡撫北畿

恭惟大寅長都憲秦先生閣下蚤承家學一經接武  
於科名荐沐皇恩十載蜚聲於禁從職專城而臨民  
豈第蒞方岳而敷政寬平和而不流剛而不激襟懷

皎潔凜凜乎奪冰雪之清德量淵宏浩浩乎並江湖  
之大茲膺九重之簡命獨當一面於京畿繡斧啟行  
當道豺狼應斂避星軺問俗窮簷雨露盡沾濡其等  
方承麗澤於一堂遽爾睽違於萬里庸聯綵幣敬製  
蕪詞既以罄賀忱亦以申別意伏希電矚幸幸

使君才器由天賦驂騑早聘青雲路京華敷歷政聲隆  
藩郡翱翔仁澤溥九重深眷顧玉節煌煌明繡斧到京  
畿揚清激濁千里民安祚東風吹散西山雨冠蓋紛

紛朝出祖黎元深感使君恩車前卧轍人無數聖主思  
賢輔姓名定入金甌覆帳明朝相思兩地空望雲間樹

右調歸朝懽

送李方伯之任山西

恭惟大方伯寅長李先生閣下米石名門清時偉器  
風標玉立秀鍾二氣之精英文思峽傾光敝九天之  
星斗早蜚聲於場屋遂發軔於仕途職諫垣而論事  
侃侃參蔽省而敷政優優肆簡在於宸衷乃荐承乎

寵渥此日榮持節鉞仰福星移照於晉陽他年進握  
鈞衡期霖雨溥施於天下某等幸同寮案於一方喜  
挹容光於數載臨歧尊酒念誨益之日踈卧轍羣黎  
悵車塵之日遠敬裁短調少敘離懷伏希電覽幸甚  
采石古名區秀鍾英傑早際風雲朝北闕諫垣名重超  
佐西江節鉞襟懷清徹底如冰雪政蹟著聞帝心簡在  
又擢晉陽新牧伯輶車到處枯槁漸回春色故人千里  
空望明月 右調感皇恩



送方伯陳公大玉之任閩藩

恭惟大方伯寅長陳先生閣下孕中州勝地之精英承  
數古先生之庭訓淵弘才器殊超絕於輩流彪炳文  
辭已著聞於蚤歲年方童丱名預計偕既登進士之  
科遂列司徒之屬奉綸音而行荒政盡復流民疏鹽  
法以實邊儲悉除宿弊茂著能聲於北闕爰參省政  
於西江御史嚴而不苛臨民寬而有制四知恒砥礪  
寸心無地著塵埃一德徧敷宣衆口有碑盈道路迺

被旌能之典載膺進秩之榮茲辰節鉞啟行闔海濱  
咸仰福星移照異日鈞衡簡畀寰宇內總期霖雨誕  
敷某等協恭幸在一方友誼已經數載臨歧尊酒念  
誨益之日踈卧轍羣黎悵車塵之日遠敬裁短調少  
敘離懷伏希電覽幸甚

使君抱負不凡少年文采稱無敵雲霄直上龍墀奪錦  
金闈通籍計省發硯政無疵厲民沾惠澤喜受知聖主  
擢參薇省經行處皆春色 天上忽頒寵命又榮遷閩南

牧伯九重宵旰恢弘治化還資輔弼棠樹陰中舊時父  
老空思行跡况同寅交契江雲渭樹此情何極 右調

寄水龍吟

送憲副汪從仁之任雲南詞并引

恭惟憲副寅長汪先生簪纓世族詩禮名家孕婺源  
川岳之靈薰紫陽道德之懿才華卓冠鮮葩絢爛耀  
詞林經史博通駭浪奔騰揚學海早登名龍虎之榜  
遂選羽鶴鷺之班玉節賦皇華胸次炯三秋之浩月

繡衣司憲紀臺端凜六月之寒威驄馬循行於隴右霜  
蹄暫蹶於滇南奸雄雖喜幸於一時公論旋喧騰於  
衆口連膺薦剡信三原大老之公明荐陟華階端一  
省羣僚之軌範惠澤方溥施於列郡姓名已簡在於  
九重賜衣仍繡豸之華博金綰黃金之重福星一點  
清光又移照於滇南膏雨十分餘潤尚均施於宇內  
某等製綵為詞言賀紀別伏希不鄙幸甚

喜清和時節梅釀微酸榴吐新葩祖席酒三行把離情

攪動亂似楊花憶著英年分陝美譽赤城霞看白壁堅  
貞青蠅雖點本自無瑕憫起佐西江臬憫吏弊民情一一  
梳爬九重思俊傑撫滇南赤子帝曰汝嘉舊日夷民識  
面重見喜無涯待邊境又寧歸朝還擬殿邦家 右調  
憶舊遊

送張天瑞都憲巡撫北畿

恭惟寅長張先生學紹家庭之源委濶步雲衢心存  
王室之憂勤蜚聲諫省爰受知於楓陛遂超佐於薇

垣陝右分藩藹棠陰於列郡閩南按節溥春色於寒  
崖一朝承北闕之恩光數載參西江之大政胸中有范  
公兵甲一揮掃贛水狼烟囊裏無馬援文犀隻手扶  
藩維之公道甫荐膺方伯之寵端超遷都憲之榮是  
雖出三事之薦揚實亦由九重之簡在此日發舟南  
浦看黎元眷戀如河內之欲借寇恂他時敷政北畿  
想父老謳歌若南國之不忘召伯某等敬以幣將情  
因詞見詞曰

三伏炎曦真爍石使君何事行勿劇王畿分鎮簡賢能  
君命有嚴遑自適西江人嘆息福星移照天之北舊同  
寅睽違矩範翹首情何極使君早蘊匡時策中外賢勞  
名赫奕此行綉斧帶霜威當道豺狼看斂迹九重方側  
席寤寐求賢敷德澤看他年進秉鈞軸霖雨蘇寰域

右調歸朝懽

送陳大參德修陞雲南右方伯

恭惟寅長大方伯陳先生世族英才明時偉器早擢

第於南畿遂看花於上苑天曹拜命衣冠萬國入銓  
衡憲部明刑囹圄一時無冤滯暫司武選綽著賢聲  
出守浙東列郡仰龔黃之治績參藩江右一方沾召  
杜之仁恩某幸同寮寀久仰範模入覲九重方馳情  
於西江之烟草遷官萬里徒極目於南徼之雲山肅  
綴荒詞庸旌別意伏希台照為幸

金榜早蜚英譽兩京歛歷劇郡分符聲赫奕超佐薇垣茂  
著旬宣嘉績黎元沾惠愛咸懽懌入覲王庭遂遷岳



牧萬里滇南烟樹碧西江父老空想甘棠行迹還期霖  
雨遍沛寰域 右調感皇恩

送同寅羅象州遷雲南憲副

恭惟寅長憲副羅先生毓秀錦江蜚聲金榜才華卓  
犖筆陣獨掃千軍德性淵冲陂量足容萬頃炳若龍  
泉出匣翩然驥足空羣棘寺發硎任錯節盤根迎刃  
而解臬臺縱步歷危途折坂如砥斯平冰雪凜而官  
吏畏威陽和敷而黎元懷惠星軺分憲棠陰將遍於

西江銓部掄才薦剡遂騰於北闕帝心簡在寵命斯  
隆載膏江右之公車爰副滇南之憲節身章明綉豸  
依然柏府舊風霜腰帶重黃金又是楓宸新雨露輿  
論稱愜僚采增輝此時萬里雲霄方展搏風之健翮  
他日九重臺閣還攀御極之飛龍某等幸資麗澤遠  
憑遠違幣慚不腆詞愧無文伏祈情炤

南浦祖筵開驪歌將闕彩鷁乘風江上發便道鄉關山  
水應增秀色兩地相思處共明月金紫輝煌青驄蹀躞

萬里風雲隨玉節  
冰霜滿面散作陽春德澤  
他年金鼎還資調燮  
右調感皇恩

送沈大參朝賀之京

恭惟寅長大參沈公畿甸華宗  
邦家偉器風標玉立  
秀鍾二氣之精英文思峽傾光  
敝九天之星斗早蜚  
英於場屋遂發軔於仕途和而  
不流廉而不劌荐揚  
中外屈指將已及三十年獨任  
賢勞計功焉可以一二  
數肆宸衷之簡在膺寵數之優  
崇燧燧不驚瀚海鯨

鯢導約束黎元無事芳春雨露樂耕耘庸製謏詞  
薄伸敬意希台覽是幸

詩禮傳家舊喜早騁驂騶康莊馳驟十年紛署聲華著  
簡拔旬宣隴右纔轉閩藩旋復承寵恩隆厚等閑間金帶  
生花海國歌誼清晝茲逢聖主龍飛正玉燭新調羣生成  
圖君函箋奏朝丹陛帶得天香盈袖華封祝後須念及蒼  
生顯候巫旋旆收取功名鷓班重筵 右調玉燭新

未軒文集卷十二